

Mid-Day Dogri News Bulletin, 06th July 2025

समे – 12:25

<><><><><>

Yatra Batch

लगातार बरा'रदी बरखा बश्कार 7 जहार 200 शा बद्ध शिवभक्तें दा नमां जत्था अज्ज बडलै श्री अमरनाथ आधार शिविर भगवती नगर जम्मू थमां कश्मीर घाटी लेई रवाना होआ। 3 जुलाई गी रंभ होई दी 38 ध्याडें चलने आली इस सलाना यात्रा नै अज्ज 50 जहार दा आंकड़ा पार करी लैता ऐ। अधिकारिएं दस्सेआ जे 1 जहार 587 महिला, ते 30 बच्चें सनें 7 जहार 208 तीर्थयात्रुएं दा 5मां जत्था अज्ज सख्त सुरक्षा बंदोबस्तें हेठ 307 गड्डिएं दे काफले च बडलै 3 बज्जियै 35 मिंटे ते 4 बज्जियै 15 मिंटे पर शिवें दे जयकारे लांदे होई रवाना होआ। बुधवार गी उपराज्यपाल मनोज सिन्हा होरें जम्मू थमां सैल्ली झंडी दस्सियै यात्रा गी रवाना कीता हा। एह्दे कन्नै गै कुल 31 जहार 736 तीर्थयात्री जम्मू आधार शिविर थमां घाटी लेई रवाना होई चुके दे न। 22 अप्रैल गी पहलगाम आतंकी हमले च 26 लोकें दे मारे जाने दे बावजूद बी यात्रा म्हेशां आला जेखा धार्मिक जोश जज्बे कन्नै जारी ऐ। भगवती नगर आधार शिविर गी मते आले सुरक्षा घेरे च रखे गेदा ऐ। अज्ज तगर साढ़े 3 लक्ख शा बद्ध लोकें यात्रा लेई ऑनलाइन पंजीकरण कराई लैते दा ऐ। तत्काल पंजीकरण आस्तै यात्रुएं दी सहूलत लेई 12 काउंटर बी खडेरे गेदे न।

<><><><><>श

DC Poonch

पुंछ दे डिप्टी कमीशनर विकास कुंडल होरें कल चडक मंडी रोड पर चला'रदे विकास कम्में दा जायजा लैता जिंदे च औंदी श्री बुड्डा अमरनाथ जी दी यात्रा 2025 दी तैआरिएं आस्तै कीते जा करदे कम्में पर टकोहदा ध्यान दित्ता गेआ। श्री कुंडल होरें शिव भक्तें दी सुचारू ते सुरक्षत ढंगै सिर आओजाई गी सहूलत आला बनाने आस्तै यात्रा रंभ होने शा पैहले शिड़कै पर लुक पाने आले कम्में गी बेल्ले सिर तोड़ चाढ़ने दे निर्देश जारी कीते। डिप्टी कमीशनर होरें मुख्ख पुलें दिऐं चला'रदे निर्माण परियोजना दा बी निरीक्षण कीता।

<><><><><>श

PM Ashura

प्रधानमंत्री नरेन्द्र मोदी होरें मुहर्रम दे 10में ध्याड़े आशूरा दे मौके पर हजरत इमाम हुसैन हुंदी कुर्बानी गी चेता कीता ऐ। श्री मोदी होरें इक सोशल मीडिया पोस्ट च आखेआ जे हजरत इमाम हुसैन होरें नेकी दे प्रति अपने धेइयै पर जोर दित्ता ते लोकें गी हर हालात च सच्चाई दा पालन करने लेई प्रेरित कीता।

<><><><><><>श

PM-Mukharjee

प्रधानमंत्री नरेन्द्र मोदी होरें मन्ने परमन्ने दे बचारक ते विद्वान डॉ. श्यामा प्रसाद मुखर्जी हुंदी जयंति पर अज्ज उनेंगी भाव भरोची श्रद्धाजंलि भेंट कीती। इक सोशल मीडिया पोस्ट च उनें आखेआ जे डॉ. मुखर्जी होरें देसै दे तान सम्मान ते गौरव दी हिफाजत लेई अपनी जिंदु दा बलिदान दित्ता हा। श्री मोदी होरें इब्बी आखेआ जे डॉ. मुखर्जी हुंदे आदर्श ते सिद्धांत विकसित ते आत्मनिर्भर भारत दे निर्माण दे नजरियै कन्नै कीमती न।

<><><><><><>श

Jatibder Singh

प्रधानमंत्री हुंदे दफतरै च केन्द्री मंत्री डॉ. जितेन्द्र सिंह होरें कठुआ जिले दी बसोहली थाहर कल इक दरबार लाया। एह ना छड़ा जिला सतह पर सगुआं तैहसील ब्लाक ते पंचैत सतह पर लग्गे दा दरबार हा। जेहड़स डॉ. सिंह हुंदे मकामी नुमायंदे कन्नै सिद्धे जुड़ने दिएं कोश्टें दा हिस्सा ऐ। दरबार दरान इक बड़डा ऐलान करदे होई डॉ. सिंह होरें बसोहली च एम्स जम्मू आउटरीच केन्द्र खड़ेर जाने दी घोषणा कीती। उनें आखेआ जे एह लोकें दी लम्मे चिरे थमां बकाया पेदी मंग ही। एह केन्द्र सुपर स्पैशिलिटी डाक्टरें ते सर्जनें दे कन्नो कन्नी इमरजेंसी सेवा दी 24 घैंटे 7 ध्याड़े मजूदगी गी जकीनी बनाग। बसोहली दी विरासती शैहर दे तौरा पर अधिसूचित कीते जाने बारे मंत्री होरें दस्सेआ जे प्रदेश दे अफसरें गी बनकदे प्रारू च प्रस्तावें भेजने लेई आखेआ गेआ ऐ तां जे केन्द्र च इस बारे गल्ल कीती जाई सकै।

<><><><><><>श

TS-Conference

जम्मू कश्मीर दे सैलसफा उद्योग गी बढ़ावा देने लेई केन्द्री सैलसफा मंत्रालय कल 7 ते 8 जुलाई गी शोरे कश्मीर अंतर्राष्ट्रीय सम्मेलन केन्द्र श्रीनगर च सब्बने राज्यें ते केन्द्र शासत प्रदेशें दे सैलसफा सचिवें दा दऊं दिने आले सम्मेलन दा सरिस्ता करा करदा ऐ। जम्मू कश्मीर च एह् अपने किस्मे दा पैह्ला सम्मेलन होग। केन्द्री संस्कृति ते सैलसफा मंत्री, केन्द्री गृह सचिव ते सरबंधम मंत्रालय दे सचिव सनें होर दुएमन्ने परमन्ने दे लोकें दे इस कार्यक्रम च शामिल होने दी मेद ऐ। उह्दे च 2025–26 लेई सैलसफा कन्नै सरबंधत बजट घोषणाएं, तरक्की बाद्धा, बुनियादी ढांचा पैहल, मंजरशुदा परियोजना दी समीक्षा, निवेश दे मौके ते फिल्म सैलसफा गी बढ़ावा देने जनेए मुख् क्षेत्रें पर टकोह्दा ध्यान दित्ता जाग। इस मोके पर कश्मीर दे सैलसफा निदेशक ते निर्देशक एस.के आईसीएस बी मजूद हे। जिनें रसद मेजबानी ते सुरक्षा उपाएं दी जानकारी दित्ती। अपने संबोधन च आयुक्त सचिव होरें आखेआ जे एह् सम्मेलन जम्मू कश्मीर लेई इक माने आली गल्ल ऐ। उनें आखेआ देस भरै थमां सैलसफा सचिवें दी मेजबानी करना इक मौके ते जिम्मेदारी आली गल्ल ऐ ते अस तनदेही कन्नै बेजोड़ बवस्था ते बेहतर तालमेल कन्नै इसी कामयाब करने लेई जुटाए दा आ।

<><><><><><>श

LG SCMeet

कोले, खाने ते इस्पात पर संसदीय स्टैंडिंग कमेटी नै सांसद अनुराग सिंह ठाकुर हुंदी प्रधानता च कल राजभवन श्रीनगर च उपराज्यपाल मनोज सिन्हा हुंदे कन्नै मलाटी लाई, कमेटी केन्द्र शासत प्रदेश जम्मू कश्मीर दे दौरे पर न। श्री ठाकुर होरें आखेआ जे कमेटी दा एह् दौरा पहलगाम आतंकी हमले मगरा भारत सरकार आस्सेआ विश्वास ब्हाली दे उपाएं दा बी इक हिस्सा ऐ। उनें गलाया जे एह्दे कन्नै समूलचे देसै च एह् सनेहा जाग जे जम्मू कश्मीर सुरक्षत, अमन ते रमानदारी आला प्रदेश ऐ। इस मौके उपराज्यपाल होरें प्रदेश दे समावेशी ते न्यायगत विकास लेई अपनी वचनबद्धता दोहराई। उनें आखेआ जे जम्मू कश्मीर दा आम आदमी अमन, रमानदारी चांहदा ऐ। श्री सिन्हा होरें आखेआ जे पहलगाम च पाकिस्तानी आतंकिएं आस्सेआ कीते गेदे हमले खलाफ इत्थुआं दिएं सड़कें पर जिस चाल्ली दे विरोध प्रदर्शन दिक्खे गे ओ बेजोड़ हे।

<><><><><><>श